

Na osnovu člana 8. stav 1.tačka b), f) i d), člana 16, 20 i 21. Zakona o radijacijskoj i nuklearnoj sigurnosti u Bosni i Hercegovini ( "Službeni glasnik BiH, broj 88/07) i člana 61.stav 2. Zakona o upravi ("Službeni glasnik BiH, broj 32/02, 102/09), direktor Državne regulatorne agencije za radijacijsku i nuklearnu sigurnost d o n o s i

## **PRAVILNIK O USLOVIMA I NAČINU PEČAĆENJA POSLOVNIH PROSTORIJA, I SREDSTAVA ZA RAD SUBJEKTA NADZORA**

### **DIO PRVI: OPŠTE ODREDBE**

#### **Član 1. (Predmet)**

- (1) Ovim se Pravilnikom propisuju se uslovi za pečaćenje, način pečaćenja i skidanja službenog pečata sa objekata, postrojenja, uređaja i sredstava za obavljanje djelatnosti sa izvorima jonizujućeg zračenja, kada je u inspeksijskom postupku izrečena mjera zabrane upotrebe istih.
- (2) Ovim pravilnikom se propisuju i drugi oblici sprečavanja upotrebe objekata, postrojenja, uređaja i sredstava za rad ako isto nije izvodljivo pečaćenjem.
- (3) Djelatnosti iz stavka 1. ovoga člana određene su propisima Državne regulatorne agencije za radijacijsku i nuklearnu sigurnost (u daljem tekstu: Agencija).

#### **Član 2. (Definicije)**

U smislu ovoga Pravilnika pojedini pojmovi imaju sljedeće značenje:

- a) **Pečaćenje:** pečaćenje predstavlja oblik neposredne prinude s ciljem izvršenja mjere zabrane upotrebe objekata, postrojenja, uređaja i sredstava za rad, naložene u toku vođenja inspeksijskog postupka.
- b) **Subjekt nadzora:** pravno lice koje koristi ili namjerava koristiti poslovne prostorije, dijelove poslovnih prostorija i sredstva za rad, radi obavljanja djelatnosti sa izvorima jonizirajućeg zračenja.
- c) **Poslovne prostorije:** pod poslovnim prostorijama se smatraju objekti , odnosno dijelovi objekata u kojima subjekt nadzora obavlja ili namjerava obavljati određenu djelatnost sa izvorima jonizirajućeg zračenja u kojima se nalaze sredstva za rad potrebna za obavljanje te djelatnosti.
- d) **Sredstva za rad:** su svi izvori jonizirajućeg zračenja i sva oprema koja se koristi za obavljanje djelatnosti sa izvorima jonizirajućeg zračenja, a za koje Agencija izdaje odgovarajuću autorizaciju.
- e) **Inspektor:** državni inspektor za radijacionu i nuklearnu sigurnost.

## **DIO DRUGI: USLOVI I NAČIN PEČAĆENJA**

### **Odjeljak 1: Uslovi za pečaćenje**

#### **Član 3.** (Pečaćenje)

- (1) Pečaćenje se vrši u slučaju kada subjekt nadzora nije izvršio mjeru zabrane upotrebe poslovnih prostorija, ili sredstava za rad.
- (2) Pečaćenje se provodi nakon što je rješenje o zabrani rada postalo izvršno i stranci dostavljen zaključak o dozvoli izvršenja rješenja.
- (3) Izuzetno od odredbi stava 1. ovog člana, ako se u toku inspekcijskog nadzora utvrdi da bi dalja upotreba objekata, postrojenja, uređaja i sredstava za rad mogla ugroziti živote i zdravlje ljudi, pečaćenje se vrši odmah po saopštenju usmenog rješenja o zabrani upotrebe objekata, postrojenja, uređaja i sredstava za rad, što se konstatuje u zapisniku.
- (4) Pečaćenje se može izvršiti odmah uz saglasnost stranke ako stranka izjavi na zapisnik da ne koristi ili ne namjerava privremeno ili trajno koristiti određena sredstva za rad.
- (5) Inspektor sačinjava zapisnik o izvršenom pečaćenju pri čemu se poziva na izvršno rješenje i sastavni dio zapisnika o inspekcijskom nadzoru je popis zapečaćenih poslovnih prostorija i/ili dijelova prostorija i/ili sredstava za rad koji sadrži vrstu, naziv (namjenu) zapečaćenih prostorija i/ili dijelova prostorija i/ili sredstava za rad.

#### **Član 4.** (Privremeno pečaćenje)

- (1) Ako se inspekcijski nadzor vrši kod subjekta nadzora, a ne može se završiti u toku njegovog radnog vremena, inspektor može izvršiti privremeno pečaćenje poslovnog prostora ili dijela poslovnog prostora ili samo opreme u tom prostoru u kojem se nalaze stvari ili dokumentacija na koje se odnose radnje inspekcijskog nadzora.
- (2) Privremeno pečaćenje iz stava (1) se vrši kada inspektor procijeni da može doći do promjene činjeničnog stanja, a vrši se radi dovršenja započetog inspekcijskog nadzora koji se ima nastaviti narednog radnog dana.
- (3) O privremenom pečaćenju poslovnog prostora ili opreme iz stava (1) ovog člana donosi se zaključak protiv kojeg se ne može izjaviti posebna žalba.
- (4) Zaključak iz stava (3) ovog člana priložit će se uz zapisnik o izvršenom inspekcijskom nadzoru.

#### **Član 5.** (Obavljanje poslova)

Za vrijeme dok je prostorija i/ili njen dio zapečaćen, mogu se obavljati samo oni poslovi koji su neophodni za provođenje rješenja inspektora/ice za radijacionu i nuklearnu sigurnost i ako se tim radovima osigurava i omogućava siguran rad i pristup zapečaćenoj prostoriji te ostalim dijelovima prostorija.

#### **Član 6.** (Fotografisanje)

Zapečaćene poslovne prostorije i/ili dijelovi prostorija i/ili sredstva za rad obavezno se fotografiraju, a fotografije su sastavni dio zapisnika o inspekcijskom nadzoru.

**Član 7.**  
(Dostavljanje)

- (1) Rješenje o zabrani i zaključak o dozvoli izvršenja rješenja pečaćenjem kojim se određuje mjera pečaćenja i odgovarajuća obavijest o pečaćenju inspektor dostavlja subjektu nadzora - korisniku poslovnih prostorija odnosno sredstava za rad.
- (2) Ako subjekt nadzora nije vlasnik poslovnih prostorija odnosno sredstava za rad, rješenje o zabrani i zaključak o dozvoli izvršenja rješenja pečaćenja kojim se određuje mjera pečaćenja inspektor dostavlja i vlasniku prostorija odnosno sredstava za rad, samo ako je za trajanja inspeksijskog nadzora, inspektor utvrdio ko je vlasnik prostorija odnosno sredstava za rad.

**Odjeljak 2: Sredstva za pečaćenje**

**Član 8.**  
(Sredstva pečaćenja)

Sredstva pečaćenja su:

- a) službeni pečat,
- b) službena traka,
- c) službeni znak,
- f) obavještenje o pečaćenju.

**Član 9.**  
(Oblik sredstava za pečaćenje)

- (1) Za pečaćenje se koristi pečat izrađen od metala okruglog oblika, prečnika 30 mm sa ispisanim nazivom „Bosna i Hercegovina, Državna regulatorna agencija za radijacionu i nuklearnu sigurnost/bezbjednost – Inspektorat“ (Prilog 1.).
- (2) Za obilježavanje se koristi traka s nazivom „DRŽAVNI INSPEKTORAT ZA RADIJACIONU I NUKLEARNU SIGURNOST – ZAPEČAĆENO“, koja je crvene boje širine 80 mm sa slovima crne boje 60 mm (Prilog 2).
- (3) Za obilježavanje velikih površina se koristi službeni znak dimenzija 450 cm x 450 cm, pozadina službenog znaka je fluorescentne žutozelene boje, sa crnim obrubom i odgovarajućom slikom precrtanom linijama crvene boje po dijagonalama i tekstem "ZABRANJEN RAD", sa nazivom DRŽAVNI INSPEKTORAT ZA RADIJACIONU I NUKLEARNU SIGURNOST (Prilog 3).
- (4) Obavještenje o pečaćenju se ispisuje na A4 formatu sa tekстом kao u Prilogu 4. ovog pravilnika.

**Član 10.**  
(Postupak pečaćenja)

- (1) Pečaćenje se vrši stavljanjem jemstvenog konca na svim ulazima, između pokretnog i nepokretnog dijela objekta (vrata i štok i sl.) ili pokretno i nepokrenog dijela izvora jonizujućeg zračenja, koji se fiksira pečatnim voskom i u koji se utisne metalni pečat Agencije, ili na drugi adekvatan način.

- (2) Sve brave na ulaznim i unutrašnjim vratima se prethodno zaključavaju ako je to moguće, a prije zaključavanja u zapisnik se unose podaci o svim stvarima koje moraju ostati u objektu.
- (3) Nakon pečaćenja na svim ulazima u objekt na vidnom mjestu se ističe obavještenje o pečaćenju.
- (4) Izuzetno inspektor može zapečatiti prostore za rad velike površine, odnosno duljine postavljanjem više službenih pečata na potrebnim mjestima.
- (5) Ako subjekt nadzora namjerava premjestiti pokretna sredstva za rad i opremu iz prostorije i/ili prostora i ako se time postiže obustava obavljanja djelatnosti ili dijela djelatnosti zbog koje bi se trebalo narediti mjera pečaćenja, inspektor će uzeti izjavu u zapisnik o tome s rokom za izvršenje, a pečaćenje narediti protekom roka u slučaju da subjekt nadzora ne postupi u skladu s izjavom.
- (6) U slučaju kada je pečaćenje neizvodljivo odnosno kada je očito da samo pečaćenje neće dovesti do željenog efekta, zabrana upotrebe vrši se postavljanjem PVC trake na pogodna mjesta objekata, postrojenja, uređaja i sredstava za rad.

### **Odjeljak 3: Uklanjanje pečata i trake**

#### **Član 11.** (Uklanjanje pečata)

- (1) Uklanjanje službenog pečata vrši inspektor kada utvrdi da su otklonjeni razlozi zbog kojih je izrečena mjera zabrane upotrebe objekata, postrojenja, uređaja i sredstava za rad.
- (2) Uklanjanje pečata vrši inspektor i u slučaju kada stranka učini vjerovatnim da će otkloniti nedostatke zbog kojih je izrečena mjera zabrane upotrebe ako se nedostaci ne mogu otkloniti bez skidanja pečata.
- (3) U slučaju elementarnih nepogoda koje mogu izazvati štetu u objektu i opasnosti po zdravlje ljudi i okoliš, uklanjanje pečata može izvršiti i stranka uz obavještenje inspektora.

#### **Član 12.** (Dokumentovanje)

- (1) O uklanjanju i ponovnom stavljanju pečata sastavlja se zapisnik u koji se unose sve radnje i podaci koji mogu uticati na dalji tok postupka.
- (2) Pečat se može skinuti i od strane stranke ukoliko je to odobreno od strane inspektora, pri čemu o navedenoj radnji inspektor sačinjava službenu zabilješku.

#### **Član 13.** ( Prelazne odredbe )

Ovaj Pravilnik stupa na snagu osmog dana od dana objavljivanja u »Službenom glasniku Bosne i Hercegovine«.

DIREKTOR

Emir Dizdarević

## Prilog 1

### LIKOVNI PRIKAZ SLUŽBENOG PEČATA (mjere u mm)



## Prilog 2.

DRŽAVNI INSPEKTORAT ZA RADIJACIONU I NUKLEARNU SIGURNOST – ZAPEČAĆENO

## Prilog 3.

Dimenzije 450 cm x 450 cm:



DRŽAVNI INSPEKTORAT ZA RADIJACIONU I NUKLEARNU SIGURNOST

Prilog 4.

**DRŽAVNA REGULATORNA AGENCIJA ZA RADIJACIJSKU  
I NUKLEARNU SIGURNOST**

**INSPEKTORAT**

BROJ: .....  
(mjesto i datum)

**OBAVIJEST O PEČAĆENJU**

nadziranom pravnom licu ..... iz ..... na lokaciji ..... na osnovu odredbe člana ..... stava ..... Zakona o radijacijskoj i nuklearnoj sigurnosti u Bosni i Hercegovini su zapečaćene poslovne prostorije ili dijelovi prostorija(-e), ) i sredstva za rad zbog povrede odredbe člana ..... stava ..... istog Zakona.

Inspektor/ica za radijacijsku i nuklearnu sigurnost će ukloniti pečat i traku kada nadzirano pravno lice postupi prema inspeksijskom rješenju i uskladi obavljanje djelatnosti s navedenim Zakonom.

**UPOZORENJE!**

Skidanje i povreda službenog pečata i trake, kao i ulazak u zapečaćenu poslovnu prostoriju, dijelove prostorije i/ili pristup ili korištenje sredstava za rad je krivično djelo prema Krivičnom zakonu Bosne i Hercegovine član .....

Nadzirana osoba ..... iz ..... dužna je brinuti o sigurnosti zapečaćenih mu poslovnih prostorija, ili dijelova poslovnih prostorija i sredstava za rad i odgovoran je u slučaju nastanka štete.

Dražavni/a inspektor/ica za radijacijsku i nuklearnu sigurnost \_\_\_\_\_